



**Aningaasaqarnermut Nunanullu Allanut**  
**Naalakkersuisoq**      **NUKINGINNARTOQ**

**Aningaasaqarnermut Ataatsimiititaliap suliaq nr. 01.31.06/06-00182 pillugu sisamanngornermi ulloq 17. august 2006-imi aalajangiinera pillugu Naalakkersuisunut ilisimatitsineq.**

(Naalakkersuisut ulloq 10. august 2006-imi ataatsimiinneranni imm. 2e)

**Nanortalimmi ilinniartut inaannut siunertat**

Naalakkersuisut **inassutigaaat**,

- kontomi pingaarnermi 62.04.05-imi, Piareersarfinnut tunngasumi, aningaasaliissutit 1,4 mio.kr.-inik ikilisinneqassasut
- kontomi pingaarnermi 84.40.15-imi, ilinniartut inaannik sanaartornermut tunngasumi, aningaasaliissutit sanaartukkamut nr. 010.62.026-mut, Nanortalimmi ilinniartut inissaannik pisinermi tapiissutinut aaqquissuussinernullu tunngasumut, atugassatut 1,4 mio.kr.-inik amerlineqassasut.

**Aningaasaqarnermut Ataatsimiititaliap oqaaseqaatai**

Qinnuteqaat matumani pineqartoq Aningaasaqarnermut Ataatsimiititaliap allattoqarfianit pingasunngornermi ulloq 16. august 2006-imi tiguneqarpoq. Suliaq nukinginnartutut suliarineqassasooq Naalakkersuisut kaammattuutigaat.

Konto pingaarneq 62.04.05, Piareersarfinnut tunngasooq, april 2006-imi Naalakkersuisut oqartussaaffiisa allanngortinneqarnerisa malitsigisaatut pilersinneqartoq aallarniutigalugu oqaatigineqassaaq. Konto pingaarnerup imarai siusinnerusukku kontot pingaarnerusimasut marluk:

64.13.17 Iitersuinermi aallarnisaanermilu qitiusoqarfiit 16.500.000 kr.-inik aningaasaliissutitalik.

40.11.19 Sinerissami Tunngaviusumik Ilinniartitaaneq 11.052.000 kr.-inik aningaasaliissutitalik.

Oqartussaaffinnik allanngueernermi, aningaasaliissuteqarnissamilli qinnuteqaammik matuminnga akuersissutiginninnginnermi, kontomi pingaarnermi nutaami 62.04.05-imi, Piareersarfinnut tunngasumi, aningaasaliissutit 27.552.000 kr.-iupput.

Oqartussaaffinnik allanngueq pissutigalugu missingersuutitigut nuussinissamut Naalakkersuisut tunngavissaat 2006-imi aningaasanut inatsimmi suliassaqaqarfinnut 10-89-imut oqaasertaliussami 1-imi allassimavoq. Oqaatiginngitsoorneqassanngilarli paasissutissat taakku suliap saqqummiunneqarnerani takuneqarsinnaasimagaluarpata, tamanna suliamik paasinninnissamut suliarinninnissamullu iluaqutaasimassagaluartoq.

Ilaatigut qinnuteqaammi allassimavoq:

*”Illumik pioreersumik Piareersarfimmi ilinniartut kommunip nunarfianeersut inissaattut atugassamik Nanortaliup Kommuneata tigusinissaa periarfissaqarpoq, Nanortaliup Kommunea qinnuteqaammuni 30. januar 2006-imersumi ”Nanortalimmi ilinniartut inaat pillugit” allappoq, illu ”Angisooq” illu nr. B 319 a/b, Nanortaliup illoqarfianiittoq pisiarinissaanut periarfissaqarluni. Kommune nangilluni allappoq:*

*” Illumik pioreersumik Piareersarfimmi ilinniartut kommunip nunarfianeersut inissaattut atugassamik Nanortaliup Kommuneata tigusinissaa periarfissaqarpoq, Nanortaliup Kommunea qinnuteqaammuni 30. januar 2006-imersumi ”Nanortalimmi ilinniartut inaat pillugit” allappoq, illu ”Angisooq” illu nr. B 319 a/b, Nanortaliup illoqarfianiittoq pisiarinissaanut periarfissaqarluni. Kommune nangilluni allappoq:*

*”Illu marlunnik inissiaqarpoq, tassanilu immikkoortortuni marlunni immikkut ilinniartut sisamat inissaqarput, init katillugit arfineq pingasut. Illu illuutillit peqatigiiffianit namminersortumit pigineqarpoq pisiarineqarsinnaallunilu 1,2 mio.kr.-ilerlugu. Taanna ilinniartut inissaannik maannakkorpiaq pisariaqartitsinermi sukkanerpaamik aaqqiissutaasinnaavoq.*

*Nalilerneqarpoq illup allannortitenera aaqqissuunneqarneralu 200.000 kr.-it misaanni akeqassasoq. Taassuma kingorna illu allannortiteneralu 1,4 mio.kr.-inik akeqassaaq. Siunnersuutigineqarpoq aningaasaliissutit kontomit pingaarnermut 62.04.05-imit, Piareersarfiit kontomut pingaarnermut 84.40.15-imum, Ilinniartut inaanik sanaartorneq aningaasanik nuussinikkut pissarsiarineqassasut.”*

Tassunga atatillugu Aningaasaqarnermut Ataatsimiititaliamit oqaatigineqassaaq aningaasaliissuteqarnissamik pisariaqartitsineq januarilli qaammataani ilisimaneqareersoq aningaasaliissuteqarnissamik qinnuteqaammik nukinginnartutut suliarinninnissamik qinnuiginninnermik ilalugu Naalakkersuisut nassiussinerat **naammaginangilluinnarmat!**

Suliaq taamaattoq ataatsimiititaliamit nalinginnaasumik suliarineqarneq ajoralarpoq, tamanali aningaasaliinissami siunertaq eqqarsaatigalugu pisariaqarsimavoq.

Suliap matumani pineqartup tuaviortumik aalajangiiffiginissaa eqqarsaatigalugu Aningaasaqarnermut Ataatsimiititaliami siulittaasup Aningaasaqarnermut Ataatsimiititaliap suleriaasiani § 5, imm. 4 naapertorlugu suliaq akuersissutigineqassasoq inassutigaa. Aningaasaqarnermut Ataatsimiititaliami ilaasortat tamanna pillugu akissuteqarnissamut piffissaliussap iluani akerliliissuteqarsimangillat.

### **Aningaasaqarnermut Ataatsimiititaliap aalajangiinera**

Siuliani allassimasut oqaaseqaatigalugit Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput.**

Inussiarnersumik inuulluaqqusillunga

Ellen Christoffersen  
Aningaasaqarnermut Ataatsimiititaliami siulittaasooq